

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaite, I Te Mau
Ava'e Atoa.

Te hoo: E Piti Toata i te Matahiti.

Nu. 4

Eperela. 1934

Mat. 28

*E haere tia vau nei i hea e moe ai i to varua? e e mau e
tia vau i hea e ore ai oe e ite mai ai? Ia paiuma vau i nia i te
mau ra'i ra, tei reira oe! ia hohora vau i to'u roi i hade, ina-
ha, tei reira atoa oe! Ia rave au i te pererau o te poipoi, a pa-
rahi ai i te hopea mai o te miti ra; na to rima e aratai ia'u i
reira," Salamo. 139:7-10.*

J. Reubena Tarati.

"O tei imi i te parau mau e tei haapao i te reira e pa-
rahi oia i roto i te mau apooraa rahi o te mau Arii."

I te mahana matamua no Setepa i te matahiti 1871 i
roto i te hoê utuafare haehaa i te oire Grantsville i te tufaa
fenua Utaha, ua fanau mai o J. Reubena Tarati Jr. te tau-
turu piti i roto i te Peretiteniraa matamua no te Ekalesia a
Iesu Mesia i te Feia Mo'a i te Mau Mahana Hopea Nei.

Ua tauturu to'na na metua, o Joshua R. Clark raua o
Mary W. Clark i te faatiaraa i te oire o Grantsville, e ua
haere to'na metua fane i te tamai tei tüpu i rotopu te feia no
te tufaa fenua Apatoërau e te tufaa fenua Apatoa i te fenua
Amarita, e ua tamai atoa to'na tupuna i roto i te tamai ma-
ta nua no te Han Amarita, e ua tae to tatou taeae o J. Reubena

Tarati i roto i te tamai raa rahi no te mau Hau tei oti ae nei, e ua riro oia ei ratira tapao maha. I rotopu i te mau faahanu.

Ua rave o Reubena i te ohipa "Kau boe" i tona apirua e ua ite maitai oia i taua ohipa ra, e na roto i taua ohipa ra e te haapo maitairaa i ta'na moni ua tae oia i te mau haapiiraa rahi o te fenua. O te apotesolo ra o Tamati tei pohe i teie matahiti i mairi ae nei, tei riro ei orometua matamua no Reubena i roto i te haapiiraa rahi.

Ua hinaaro oia ia riro oia ei taata auvaha ture, na roto i to'na itoitoe e to'na hinaaro ia haapii i taua mau mea ra, ua riro oia ei pipi numera hoê i roto i to'na mau pupu.

I te matahiti 1906 o to'na ia mahitiraa na roto mai i te haapiiraa, e ua maitihia oia e te papai parau matamua no te Hau Amerika ei taturu no'na. I te matahiti 1910 ua horoa te Peresideni no te Hau Amerika i te hoê ohipa fifi roa ia'na, oia hoi, te faaafaroraa i te tahi mau peapea i ropu i te Hau Amerika e te tahi Hau ê, e ua afahia taua haavaraa ra i mua i te aro o te Arii no te fenua Beretane, e na'na ia i hio-poa i taua haavaraa ra, e na to tatou taeae o Reubena i haapao i te mau mea no te Hau Amerika i roto i taua haavaraa rahi ra; e ua manuia roa oia i roto i ta'na titauraa ia horoahia e \$900,000,00 na te Hau Amerika.

E i te matahiti 1927 ua maitihia oia ei tauturu hoê no te papai parau no te Hau Amerika, e i te matahiti 1930 ua maitihia oia e te Peresideni no te Hau Amerika ei mono no te Hau i te fenua Mexico, e te reira ta'na ohipa i te taimi i maitihia ai oia ei tauturu piti i roto i te Peresideniraa matamua no te Ekalesia.

Ua tae Reubena i te 62 o to'na matahiti e e mea itoitoe roa oia. Ua faaipoipohia oia ia Luacine S. Clark e e 4 tamaiti ta raua.

Na roto i ta'na imiraa i te parau mau e te haapaoraa

i te reira, ua parahi oia i roto i te mau apooraa rahi o te mau Hau.

Ua farerei oia i te mau Arii e te mau taata faatere i te mau fenua êê. Ua riro oia ei taata paari i mua ia ratou, e e taata herehia oia, e te mau taata atoa.

Ua mauuuru tatou i te mea e ua maitihia oia ei hoê no te Peresideniraa matamua no te Ekalesia.

Papaikia e Leroi Marori.

Te Haehaa Mau.

Ua haaputuputu maira te Atua i te mau varua atoa i te ra'i ra i mua i to'na aro e ua faaite atura oia i te huru o te opuaraa no te ora mure ore. Ua faaite atura oia ia ratou e e hinaarohia te hoê Faaora no to te ao nei, i roto i ta'na hoho'a, oia hoi te Evanuelia. Ua tia maira te hoê varua haehaa rahi roa ra, o Emanuela to'na i'oa, ua na ô maira oia i te Atua e, "E te Metua, teie au, e tono atu na ia'u nei. Ia tupu to oe hinaaro, e no oe te hanahana e a muri noa atu." Te vai ra atoa râ te hoê varua teitei ra, o Lucifero to'na i'oa, te tamaiti hoi oia no te poipoi. Ua tia maira oia i nia e ua na ô atura oia i te Atua e, "Inaha, teie, a tono atu ia'u nei, e e riro vai ei Tamaiti na oe e na'u e faaora i te taata atoa, ia ore te hoê ia moe; e mea papu roa e oti ia ia'u, e no reira a horoa mai oe i to oe hanahana ia'u nei." Ua maiti atura te Atua i te varua matamua ra no te mea e varua haehaa roa oia.

Ua tupu maira to Lucifero riri e ua haaputuputu maira oia i te mau varua atoa e pee mai ia'na ra, e ua faatupu atura oia i te peapea i te Atua. I te hopea ra ua tiavaruhia

atura oia e, te man varua i pee atu ia'na ra, i rapae i te ao ra, e ua faautu'ahia ratou e te Atua no to ratou teoteo.

Ia tae i te tau mau i faataahia e te Atua i roto ta'na opuaraa ra ua tono maira oia i ta'na iho Tamaiti, o Emanuala, i te ao nei no te raveraa i te ohipa i boroahia atu ia'na.

I to'na apîraa aita oia i huru ê roa i te mau tamarii noa nei, ua hauti noa râ oia i te mau hautiraa i hantihia e te mau tamarii i te reira anotau, area râ, ua auraro maite oia i to'na na metua i te pae au tino nei. E toru ahuru matahiti to'na auraroraa i to'na na metua na mua a'e i te haamataraa i "te ohipa a to'na Metua." E mai te mea e hiopoa noa tatou i te mau ohipa atoa ta'na i rave e ite ihoa ia tatou i te mau mea o tei haapapu i te huru no to'na haehaa mau.

Ua ite oia i te ohipa hanahana roa i faataahia na'ua, tera râ ua haapao oia i te oroa baptizoraa, e ua haapao roa oia i te mau ture atoa no te Evanelia e te ture fenua hoi. Ua faateiteihia oia e te taata nei no te mau semeio ta'na i rave i rotopu ia ratou ra, tera râ ua pahono atura oia ia ratou e, "Aore au i haere mai nei e faatupu i to'u ihora, i to tei tono mai râ ia'u nei hinaaro." Aita roa hoi oia i rave i te hoê mea na roto i to'na iho manao, no te mea ua na ô maira oia e, "Aore au i rave i te hoê mea maori râ i ta'u i ite i to'u Metua i te raveraa ra." E mai te mea e hiopoa noa tatou i to'na oraraa e tae noa'tu i te taime oia i faasataurohia ai ra tira ra te mea e itehia e tatou nei, oia hoi te mau faaiteraa i to'na haehaa rahi ra.

E i teie nei ra ua faateitei-roa-hia atu oia i nia roa i te terono teitei roa ra i te rima atau o te Atua Metua. "Inaha ua vetea a'era te ra'i e ua ite atura vau i te Tamaiti a te taata nei i te parahiraa i te rima atau o te Atua mana." No to'na haehaa i na reirahia ai ra.

Ua na ô maira Iesu i to'na ihora anotau e, Ia ore te taata ia faahaehaa ia'na iho mai te tamarii rii e ore oia e ô

i te basileia. E ua na ô atoa maira oia e, "Oia ia, e ao to tei haehaa te aau, ô tei tae ia'u ra, no ratou hoi te basileia ra o te ao." (*III Nephi 12:3.*) E no reira, e homa e mea tia roa ia tatou ia hiopoa maite ia tatou iho e ia faahaehaa hoi ia tatou iho. Noa'tu i te toroa teitei e tae i nia ia tatou eiaha tatou e teoteo no te reira. O Iesu ihoa to tatou aratai e to tatou hoho'a mau no te haehaa, ia pee tatou ia'na e tia'i. "O tei faateitei ia'na ihora, e faahaehaahia ia, area o tei faahaehaa ia'na ihora, e faateiteihia ia," e tae noa atu i te ora mure ore. O ta tatou ia e fana'o nei.

Papahia e MITIELA

Te Faatupuraa i Te Hara.

Na ô maira te hoê taata haavarehia, te taata i arataihia i roto i te ohipa ino e, "Na vai i aratai ia'u i roto i ta'u ohipa ino? Te Atua anei e aore râ te Diabolo anei?"

E homa, te na ô mai nei te parau a Iakoba e, "Eiaha roa ei taata haavarehia e parau e, ua haavarehia vau e te Atua, e ore roa hoi te Atua e vare i te iho, e ore roa hoi oia e haavare i te taata." (*Iakobo 1:13.*) E no reira ra, na roto i te taioraa e te feruriraa i nia i teie nei irava, ua ite tatou e, aore roa e ravea i te Atua ia aratai i te taata i roto i te hara e te ohipa ino.

E teie nei, e imi tatou e, na vai ra i aratai i te taata i roto i teie nei huru ohipa. E taio atoa tatou i te tahi parau a Iakobo, na ô maira taua parau ra e, "Ua haavarehia râ te taata ia faahahau-ê-hia, e ia riro noa atu i to'na iho hinaaro tia ore. E ua tô ana'e taua hinaaro tia ore ra, fanau maira ta'na o te hara, e ia rave-faahope-hia te hara ra, fanau mairaa ta'na o te pohe." (*Iakobo 1:14-15.*) Ua faa-

ite papu roa maira teie nei na irava ia tatou e, na roto i te hinaaro o te taata ua arataihia oia ia rave i te hara. Eaha tana hinaaro ra o te taata? Teie ia; oia hoi, to'na hinaaro i te mau mea no te ao nei e to'na hinaaro i te mau mea e au i to'na iho tino. E na roto i tana hinaaro ra, na riro oia ei enemi no te Atua e ei hoa no te ao nei. Maite au i te parau a Iakobo, tei na ô mai e, "----O te hinaaro i teie nei ao, e hoa au ore ia i te Atua ra. E teie nei, o te titau e ei hoa oia no teie nei ao, ua taa maite ia oia, e e enemi no te Atua. (Iakobo 4:4.)


No reira e homa, na roto i te faarueraa o te taata i te Atua ua farii mai ratou i te Diabolo e ta'na mau ohipa, e ua riro ratou ei mau tavini no'na ra, e ua aratai noa oia ia ratou i roto i te ohipa iino atoa, e te hopea no tana mau taata ra, e roan mai ia ratou te pohe eiaha te pohe no te tino te poheraa râ o te varua.

E homa, i teie nei e imi tatou i te ravea ia paruru ia tatou iho i te tumu no te hara e te mau ohipa iho. Teie ia tana ravea ra, ia haapao tatou i te parau a Iakobo, e teie tana parau ra, "E teia na, e auraro atu outou i te Atua. E patoru atu i te diabolo e na'na e mau e atu. E haafatata atu i te Atua e na'na e haafatata mai ia outou na----" (Iakobo 5:7-8.) E eaha ta tatou ravea ia haafatata atu i te Atua, maori râ na roto i te haapaoraa i ta'na mau faanua atoa.

Papaia e Ioane.

A farii mai ai outou i te parau a te Atua; eiaha outou e farii i te parau a te Atua ei parau a te taata, ei parau mau râ ia na te Atua. (I Tesalonía 2:13.)

lesia
i H.
men
Uta
ra o



Te hohoa i nia roa ra, e hohoa ia no te Hiero no te Eka
lesia a Iesu Mesia i te Feia Mo'a i te Mau Mahana Hopea Nei
i Hawaii, te hohoa i te pae, aui ra e hohoa ia no te pupu hi-
mene e te hamonia rahi i roto i te fare Menemene i Roto Miti,
Utaha. Te hohoa i te pae atau ra, e hohoa ia no te Aposto-
ra o Iatodo E. Tamati o tei pohe a'enei.



Tauturu hoê no
te Peretiteni ma-
tamua no te Eka-
lesia.

Anatona W. Ivini

Te Tiamaraa.

“E e mea ino ia outou ia haamori ia Iehova, e faataa na outou i tele hei mahana i ta outou e haamori;--Area van e to'u atoa utnafare, e haamori ia matou ia Iehova.” (Iosua 24:15.)

Ua faaroo tatou e na horoa te Atua ia tatou i to tatou tiamâraa. E ahiri aita te Atua i horoa ia tatou i te reira, aita roa e nehenene ia faautua ia tatou no te mau ohipa i ravehia e tatou i tele oraraa.

E mea tia hoi ia vai na pae e piti i te mau mea atoa ra. Ahiri aita te reira, ia vai noa mai te mea pohe e tia'i, aita hoi to te reira e ora, aita hoi e pohe, e ere ia i te mea tahuti noa, e ere i te mea tahuti ore, aita o'na e oaoa, aita e ati, aore e ite, aore atoa e ite ore.

No reira e haapao maitai tatou i to tatou tiamâraa, e mea tia ia faaanu i te tiamâ i te auahi. Ia haapao maitai te taata i te auahi e riro te reira ei tavini na'na; e ia haapao ore te taata i te auahi e papaa to'na fare e e riro i te reira e ati rahi roa. Ia haapao maitai te taata i to'na tiamâraa e riro te reira ei tavini no te ora mure ore, e mai te mea ia haapao ore te taata i to'na tiamâraa e riro te reira ei tavini no te pohe mure ore.

Elaha tatou e feruri e te vai nei te tahi taata tei faatere i to tatou mau varua, o tatou te raatira o to tatou iho mau varua.

Na ô maira te Atua, “E riro outou ta'u mau tamarii, e riro outou i te Basielia o te ao, e riro outou mai ia'u i te hurn, mai te mea e haapao outou i ta'u mau faaneraa.” Tei ia tatou tele mau mea, mai te mea e haapao tatou. E ere te ohipa a te Atua i te ohipa teiaha, e ia tomo tatou i roto i te ohipa a te Atua i reira e ite ai tatou i te hau e te oaoa mure

ore.

Ua horoa te Atua ia tatou i te ture e te reira to tatou aratai, oia hoi to tatou pahi, e mai te mea e ofati tatou i te ture e parari ia tatou i nia i te ofai e te pohe mure ore, oia hoi te hara. Aita hoê ora i roto i te hara, e e taaunu te hara ia tatou i roto i to'na mau fifi, e e haru oia i to tatou tianiâ raa, ei reira e riro tatou ei tavini no'na, oia hoi e tavini no te pohe.

Tei ia tatou te maitiraa. Te utua o te hara o te oto ia e te mamae e te pohe mure ore. Te utua o te parau-tia a te Atua, o te aroha ia e te oaoa, e te hau, e te faaoromai, e te mārû, e te maitai, e te faaroo. No reira ia paari tatou e tia'i e ia maiti tatou i te mea maitai.

Papaiahia e Heta

Ua Hoi To Tatou Orometua

I te 27 no Fepuare ua hoi atura o Hesa i to'na fenua ai'a, oia hoi, Ashton Idaho.

Ua tae mai oia i Tahiti nei i te 6 no Ditema i te matahiti 1930. Mai Tahiti nei ua haere oia i Makatea e i Raiatea, e mai reira ua haere oia i Taega ia tauturu i te hamaniraa i te fare Pureraa i reira e i te otiraa i te reira fare, ua haere oia i Hikueru ia tauturu faahou i te faaapiraa i te fare Pure-raa i reira e i te oti raa o taua fare ra, ua anihia oia ia haere i Nihiru ia faatere i te hamaniraa i te hoê fare Pureraa i reira, e ua oti atoa taua ohipa ma te nehenehe roa ra e ua reva atu ra oia i Tahiti. E mea poto roa to'na faaearaa i reira, no te mea ua tae te faaueraa ia'na ia reva i Tubuai no te faatere i te ohipa i reira, e ua faatere oia i te ohipa i Tubuai e hoê matahiti e te afa mai te peapea ore, e ua faatere atoa

oia i te hoê fare Pureraa nehenehe i te Amaa ra i Mahu.

I te mau mahana hopea no Novema i te matahiti 1933 o te taima ia i anihia'i oia ia haere mai i Tahiti no te tautururaa i te neneiraa i te Heheuraa apî, e te reira ta'na ohipa e tae no atu i te taima i reva atu ai oia.

Oia mau ia, te oaoa nei tatou i te mau ohipa maitai ta Heta i rave, e e vai noa te reira ei haamanaoraa ia'na i roto i to tatou aau e tei ia'na te here e te hamani maitairaa no te mau taata atoa o tei farerei ia'na.

E Heta e ia tae oe i to oe fenua mai te maitai e te peapea ore, ia riro ta oe farerei raa i to oe mau fetii ei farerei raa hanahana roa e ia maitai to oe faaearaa, e ta oe ohipa i reira, o to matou ia pure,

Papai hia

Heheuraa Api.

Ekalesia i Vaihi

O vau o Pirî, e mero note Ekalesia i Faaapihia, te faaite nei au i te huru no to'u taeraa i te fenua Vaihi. E fenua nehenehe roa taua fenua ra, e ta ratou peu e peu papaa ia, e te faaite nei au i te huru o te Ekalesia a Iesu Mesia i te Feia Moa i te Mau Mahana Hopea Nei. E pupu taata maitai roa taua feia ra, ua faarii maitai ratou ia'u, e ua farerei atoa vau i te hoê tamaiti no Tahiti nei, o Viriamu to'na io'a, e tamaiti na Viriamu Teua e fetii no te vahine a Toae a Maire; Ua haamataitai oia ia'u i te mau vahi atoa o te Ekalesia Momoni i Vaihi, ua tae vau i roto i te mau fare pure raa ta'na i faaratai ia'u, e mea i roa te mau fare pure raa i te taata, e te mau pûpû himene mea nehenehe roa, te mau pûpû pû, te pûpû Kitara, e ta ratou mau peu atoa mea maitai roa, ua farii

maitai Viriamu ia'u i to'u parahi raa i reira, e o oia ia te Peretiteni no te pûpû Feia api i Vaihi, e hoê tamaiti Vaihi te taturu ia'na, e te faaite nei au i te rahi raa o te mau fare pure raa o taua Ekalesia ra ta'u i ite, ua toru ahuru e tiahapa fare pure raa e te vai atura â te tahi mau fare pure raa i te tahi mau oire, o ta'u ra teie i ite. I te farue raa o Viriamu i onei ua tae oia i te fenua papaa, e rave rahi ta'na mau peu rii au ore i rave, teie nei ra, ua riro oia ei tavini man no te ohipa a te Atua, e ere atu ra ia te mea oaoa te hoê taata mai te reira te huru o tei faaore i te mau peu o teie nei ao? o tei opua pa'u i te taviui i ta te Atua ohipa, oia mau roa ia, e tupu i hoa te oaoa, e e riro atoa teie nei tamaiti ei haapiiraa i te mau huru taata atoa i te ao nei.

Papai hia To outou Taeae.

Piri â Fatitiri.

Te Mau Parau Api.

E Pahi Reva Api

Te hamanihia nei, i te oire ra o Paris, e te taata ra o Rene COUZINET, oia hoi, te taata tei hamani i te pahi reva te Arc en Ciel tei mau na nia i te moana Atlanitika apatoerau i roto i na hora e 10, te hoê pahi reva api o te tere na nia roa i te reva e o te tae, ia tere oia, i te oire ra o New-York, Amerika, i roto i na hora ra e 17 mai i Paris atu.

Ua maitihia.

Te faaitihia mai nei, i roto i te hoê ve'a no Amerika mai, ua maitihia, e te mau taata faatere no te Hau Amerika, te taata ra o Marriner S. ECCLES, ei tauturu no te taata faatere i te mau ohipa faufaa moni no te Hau Amerika. E melo taua taata ra, o Marriner S. Eccles, no te Ekale-

sia a Iesu Mesia i te Feia Mo'a no te Mau Mahana Hopea Nei, e te tumu oia i maitikia'i no taua ohipa ra, no to'na ia aravihi e to'na haapao maitai.

Ua tapu i to'na iho rima.

A mare ai te cowboy ra o Mike VIAL i te puaatoro, ua roohia oia i te hoê peapea rahi. I te taime oia i mare ai i tepuaatoro ua taamuhia e ana te hopea o ta'na taura i nia i te poro o to'na parahiraa, e i te maura o te puaatoro tafifi ihora te taura i to'na rima e i te etataraa o te taura mau-roa'tura to'na rima. No te puai o to te puatoro e to te puaahorofenua ume-raa haamata'tura to'na rima i te motu, e no ta'na ravea ore ia tatara i to-na rima rave ihora oia i ta'na tipi e tapu taa e atura i to'na iho rima, e i reira matara ihora oia i taua ati rahi ra.

E Taiaamani rarahi mau.

Ua iteahia i te vahi i paraubia Elandsfontein, i Aferika apatoa, na taiaamani rarahi mau, oia hoi ua tae te faito o te hoê i te 500 kara, e e mea maitai hoi, e te piti ra ua tae to'na faito i te 726 kara e e taiaamani tei hau roa'tu ia i te nehenehe. Ua horoshia, i te taata tei ite i taua na taiaamani ra, i te moni e (375.000) Toru ahuru ma hitu tauatini tara moni marite e aita oia ifarii i taua moni ra.

Ua mau te pahi i te tohoroa.

Ua faaitehia na roto i te radio, te tere ra te pahi ra o S.S. President Taft, mai Balboa i New York, e a tere ai taua pahi ra na tua ua ō oia i nia i te hoê tohoroa, e no te rahi o taua i'a ra mau roa'tura te pahi. E i'a rahi mau? Te na ō atoa maira taua parau ra e, aita te pahi i ino, area te tohoroa ua ino roa ia.

Ua pohe i te toetoe,

Te faaitehia nei, i roto i te hoê parau no te fenua Tapone e, no te puai o te toetoe i tupu nia i te motu ra o Utsuryo, ua rave rahi te mau taata tei pohe. I te taime i ore rii ai te toetoe ua haere te mau taata tanturu i nia i taua motu ra, e i to ratou taeraa i reira iteahia ihora, e ratou, na tino pohe e piti ahuru, e te manaohia nei, e te mau taata no te Hau, te vai nei te pae rahi o te taata o tei pohe, no reira ua tonohia te mau taata no te mau vahi i fatata ia haere ia imi.

Ua itoitō mau.

O te tāata te mata'u ia manao oia e e tapuhia oia e te taote, e tia ia'na ia hi'o i te itoitō o te hoê tamahine iti, o Ruth Virginia Diamond to'na i'ca o tei tae i te 13 o to'na ra matahiti. Te faaorāora nei oia, i teienei, i te 28 o to'na tapuraahia, e te taote, no te hoê ma'i o to'na mau ivi: ua haamatahia te tapuraa matamua i te 4 o to'na matahiti, e i te hopea ua matau roa oia i te reira huru ohipa, e no reira, i to'na nau tapuraa hopea, aita oia i faatia ia faataotohia oia i te raau, ia tapu noahia ra.

Aita e taa faahou.

No te fanauraa o te 19 o to'na tamarii, i roto i na matahiti e 23, i tupu ai te parau a te vahine a te taata rā o James F. Alkire. Na ô atura taua vahine ra: "Aita vau i te faahou e o vai te i'ca e topa, no te mea ua pau te mauri'oa o te aufau fetii." Hoê ahuru ma pae tamarii, e pae tamaroa e e hoê ahuru tamahine e ora nei tei haere, to ratou matahiti, mai te piti ahuru aore a haere atu ai i raro.

Ua pau i te ma'o.

I te faaiteraahia, i na taata toopiti tei haere tapuni noa na nia i te pahhi Tapone faauta tiritā ra o Kurama Maru, e tapeahia raua i te auri ia tapae te pahhi i Los Angeles, ou'a i hora raua i roto i te miti i tua i te fenua Mexico, e i te taime raua i ou'a ai 13 maille te atea te pahhi i tua e na rahi roa te ma'o tei na muri noa i te pahhi. Ua tauma huna noa teie nau taata, i nia i te pahhi, i te oire rā i Galveston e i te taeraa te pahhi i Panama to raua itearaahia. Te manaohia nei e, ua opua raua i te au atu i nia i te fenua i te taime i ou'a ai raua i roto i te miti.

LOUIS DROLLET *Gérant*

L. R. MALLORY *Imprimeur.*

Rue Dumont d'Urville, Orovini, Papeete, Tahiti.